



# mjesečni Bilten

omladinska mreža bosne i hercegovine

april  
travanj  
2018.

227

## Dragi prijatelji/ce,

Predstavljamo vam aprilsko izdanje mjesečnog informativnog Biltena Omladinskog resursnog centra (ORC) Tuzla i Omladinske mreže Bosne i Hercegovine, koja za sada broji **184** organizacije i **115** pojedinaca iz **75** mjesta BiH.

Bilten trenutno izlazi na bosanskom-srpskom-hrvatskom i engleskom jeziku.

Bilten sadrži informacije o radu Omladinskog resursnog centra (ORC-a) Tuzla, mjesečne aktivnosti omladinskih organizacija, neformalnih grupa i pojedinaca - članova Omladinske mreže Bosne i Hercegovine, njihove planove za naredni period i ostale korisne obavijesti namijenjene mladima i NVO sektoru (donatorski pozivi za projekte, konferencije, seminare, školarine, stipendije i sl.).

Ukoliko želite da budete na mailing listi za naredna izdanja mjesečnog informativnog Biltena, ili ako imate pitanja ili sugestije, javite nam se. Mjesečni informativni Bilten, kao i arhivu dosadašnjih izdanja možete naći i na web stranici Omladinske mreže Bosne i Hercegovine:

[www.omladina-bih.net](http://www.omladina-bih.net)



### SADRŽAJ

Aktivnosti u aprilu 2018. ....	2
Planovi za maj 2018. ....	8
Aktivnosti članova mreže .....	9
Saopštenja/informacije/donatori/pozivi .....	17

Uživajte u čitanju!

# AKTIVNOSTI ORC/HCA U APRILU 2018.

## OKRUGLI STO „PRIHVATANJE OŠTEĆENOSTI“

Omladinski resursni centar Tuzla, unutar Nacionalne kampanje “Prihvatanje oštećenosti”, organizirao je okrugli sto u Sarajevu, 9. aprila, u sklopu projekta “Divided past – Joint future”. Nosilac projekta je OKC Banja Luka, zajedno sa još 19 partnera - organizacija iz Zapadnog Balkana i Turske, a finansiran je od strane Evropske Unije. Poziv za okrugli sto upućen je predstavnicima civilnog sektora, vlastima, medijima i poslovnog sektora iz Sarajeva i okoline.



Okrugli sto je održan u poslovnom centru “Networks”, sa početkom u 12:30 h. Uvodnu riječ na okruglom stolu uzela je Marinela Šumanjski (SEEYN edukacijski centar Sarajevo).



Miralem Tursinović, direktor Omladinskog resursnog centra Tuzla, govorio je važnosti projekta, upoznao učesnike sa dosadašnjim realizovanim aktivnostima i ciljem kampanje - važnost učešća organizacija civilnog društva u procesu pomirenja u državama Zapadnog balkana i Turskoj.

Istraživanje “Procesi pomirenja u državama Zapadnog Balkana i Turske: Kvalitativna studija” predstavio je Jasmin Jašarević (PRONI Brčko). Istraživanje je rađeno u Bosni i Hercegovini, Crnoj Gori, Srbiji, Kosovu, Makedoniji, Albaniji i Turskoj.

Istraživanje je uključilo stavove i mišljenja građana, predstavnika javnog, privatnog i civilnog sektora na temu procesa izgradnje mira, pomirenja, te same uloga civilnog sektora u tim procesima.

## „Građanska laboratorija za društvene inovacije“

Radionica pod nazivom „Građanska laboratorija za društvene inovacije“ održana je 27. aprila u Vitezu, u organizaciji Omladinskog resursnog centra Tuzla, a u saradnji s Udrugom mladih „Enter“ iz Viteza.



Sudionike su pozdravili i prigodno im se obratili: Mario Bošnjak Matić - zastupnik Skupštine SBK, Ivica Keser - predsjednik Gradskog vijeća Grada Popovača i Ivica Petrović zamjenik gradonačelnika Grada Popovača, a radionici je prisustvovala i Marija Grabovac, pomoćnica općinskog načelnika Općine Vitez.

Na radionici je učestvovalo pedeset učesnika, a vodili su je Slobodan Blagovčanin iz ORC-a Tuzla i Ivan Sajević iz UM „Enter“ Vitez. Cilj radionice bio je rad na društvenim izazovima na putu prema regionalnom pomirenju, te kreiranje

inovativnih alata za postizanje mira.

Tokom radionice učesnici su su obradili, a zatim i prezentovali sljedećih 5 tema: Prekogranična saradnja biznis sektora, društvena preduzeća i utjecaj na događanja u regiji; Uloga biznis sektora, vladinog i nevladinog sektora u prekograničnoj saradnji država Zapadnog Balkana; Važnost omladinskih razmjena za suočavanje s prošlošću, pomirenje i budućnost u Bosni i Hercegovini i regionu; Odsustvo rata u BiH; Mir ili ne?; Uključenost medija, javnih institucija i udruženja građana na društvenim pitanjima.



Ova aktivnost dio je projekta [Divided Past- Joint Future](#), koji ORC Tuzla realizuje u suradnji sa OKC Banja Luka, uz finansijsku podršku Evropske Unije.



## Trening „Forum teatar“ Vitez



U sklopu projekta „Mladi za bolju budućnost“, podržanog od strane Ambasade SAD u Sarajevu, u Vitezu je od 25. do 29. Aprila održan petodnevni trening na temu forum teatra.

Trening u organizaciji Omladinskog resursnog centra Tuzla, i u partnerstvu sa Udrugom mladih „Enter“ Vitez, okupio je 25 mladih ljudi iz Brčkoga, Tuzle, Doboja, Viteza i Travnika, selektovanih nakon predhodnih treninga, koji su se održali u navedenim gradovima.

Treneri na ovom treningu su bili Miralem Tursinović i Jasmin Jašarević, koji su kroz petodnevni trening sa učesnicima prošli kroz teoriju i tehnike forum teatra. Prvi dan treninga je bio fokusiran na izgradnju grupe, a ostatak treninga se bazirao na teoriji i tehnikama pozorišta potlačenih.

Drugog i trećeg dana treninga učesnici su radili na tehnikama izgradnje ideje, scenarija i karaktera Forum teatra. Na neformalan i inovativan način, učesnici treninga su naučili kako stvoriti scenu za forum teatar, te kako odžati teatar potlačenih (forum teatar), i pomoću toga, zajedno sa publikom pokušati doći do rješenja

problema postavljenog u sceni.

Uz mentorstvo trenera, učesnici su zadnji dan izveli predstave koje su kreirali tokom radionice, te tako pokazali da stečeno znanje mogu iskoristiti u praktične svrhe i samostalno održati forum teatar, sa problemima iz njihovih lokalnih zajednica. Učesnici su izrazili zadovoljstvo stečenim znanjem i tehnikama na treningu, te odlučili u njihovim lokalnim zajednicama održati forum teatar kao nastavak ovog treninga.



## Trening za trenere – Transformacija narativa – Hag, Nizozemska



U holandskom gradu Den Hag, od 8. do 15. aprila održan je trening za trenere pod nazivom „Transformacija narativa“. Trening je okupio 25 mladih iz država svijeta i Evrope, uglavnom oslanjajući se na mlade graditelje mira iz konfliktnih i postkonfliktnih društava. Tokom intenzivnog sedmodnevnog treninga, mladi graditelji mira su imali priliku da usavrše svoja znanja i vještine, kao i da se upoznaju sa novim pristupima u „peacebuilding-u“, naročito kada govorimo o transformaciji narativa.

Predstavnik Omladinskog resursnog centra Tuzla je bio Slobodan Blagovčanin, a njegovo učešće - zajedno sa našom organizacijom podržala je i UNFPA BiH. Trening je realizovala Ujedinjena mreža mladih graditelja mira (UNOY), a pred učesnicima u narednih mjesec dana je zadatak da naučeno prenesu u svoje lokalne zajednice kroz edukacije za mlade.

## Konferencija mladih Evropske Unije



U mjesecu aprilu, glavni grad Bugarske – Sofija bila je prijestolnica mladih, obzirom da je Konferencija mladih Evropske Unije okupila preko 250 učesnika, koji su zajednički radili na kreiranju 11 strateških ciljeva, koji će ići prema Evropskoj komisiji za narednu strategiju EU prema mladima.

Zahvaljujući UNFPA BiH i ostalih država Zapadnog Balkana i istočnog Partnerstva, na ovoj konferenciji su priliku dobili i mladi iz tih država, koji su ravnopravno učestvovali u kreiranju gore spomenutih ciljeva.

Naredna konferencija je zakazana za mjesec septembar u Beču, kada će mladi imati priliku da daju prijedloge za konkretne aktivnosti koje bi se mogle uraditi, prateći strateške ciljeve dobijene u Sofiji. Predstavnik Omladinskog resursnog centra Tuzla, ali i Bosne i Hercegovine na konferenciji bio je Slobodan Blagovčanin.

## Omladinska grupa ORC Tuzla

### UMiD

Uči, misli i djeluj (UMiD) je jednogodišnja obuka koju organizuje Institut za razvoj mladih KULT, Sarajevo. U periodu od 27. do 29. aprila, održan je treći, od ukupno deset modula. Modulu su prisustvovali članovi Omladinske grupe ORC-a: Samira Aličić, Merima Čokić i Mario Mrkić. UMiD je obuka koja polaznicima nudi mogućnost da steknu samopouzdanje, sagledaju svoje sposobnosti i potencijale, te razviju osjećaj za odgovornost u društvu i steknu vještine timskog rada i liderstva. Obuka je zvanično priznati vid neformalnog obrazovanja koje mladima pruža mogućnost stjecanja



različitih kompetencija, koje će ih učiniti konkurentnima na tržištu rada, a program se sastoji od seminara, praktičnih vježbi i volonterskog rada. UMiD je namijenjen mladim ljudima od 15-30 godina. Omogućava da mladi postanu aktivni lideri u svojoj lokalnoj zajednici i pomognu u rješavanju problema mladih, upoznaju nove prijatelje, nauče nove vještine, druže se i usavrše sebe.

Tema trećeg modula su Politike prema mladima.

#### Sažetak modula:

- Razlika između politika i strategija,
- Sadržaj politika prema mladima,
- Kako se kreira strategija prema mladima/Omladinska politika,
- Zakoni o mladima u BiH,
- Predstavljanje mladih na međunarodnom nivou.

Cilj ovog modula bio je da se polaznici obuke osposobe primijeniti zakonske odredbe o mladima u BiH prilikom traženja svojih prava u zajednici, da se upoznaju sa načinima uključivanja u proces donošenja odluka o pitanjima koja se tiču mladih, prepoznaju elemente dobre ili loše politike prema mladima u svojoj lokalnoj upravi kako bi mogli djelovati, prepoznaju probleme i potrebe mladih, te se upoznaju sa koracima za izradu strategije prema mladima/omladinske politike koja predstavlja put i način za unapređenje položaja mladih.

Znanje o politici prema mladima obuhvata razumijevanje osnovne terminologije koja se koristi u oblasti kao što su politika prema mladima, mehanizmi politike prema mladima, vijeća mladih/omladinski savjeti itd. Također, ono podrazumijeva razumijevanje značaja primjenjivosti institucionalnih mehanizama za omladinsko organiziranje i brigu o mladima, te svijest o važnosti njihovog postojanja za mlade.

## „Uticaj antikoruptivnog obrazovanja na promjenu percepcije mladih o korupciji“



U Tuzli je, 20. aprila, u prostorijama MIOS trening centra, održan drugi Antikorupcijski forum mladih u Bosni i Hercegovini na temu „Uticaj antikoruptivnog obrazovanja na promjenu percepcije mladih o korupciji“.

Svrha Foruma bila je otvoriti dijalog mladih o percipiranom nivou korupcije u obrazovanju u BiH, u kojim oblastima se javlja, na koji način se manifestuje, ali i kako antikorupcijsko obrazovanje utiče na promjenu percepcije mladih o korupciji.

Organizator Foruma je Udruženje Croa, uz podršku Američke agencije za međunarodni razvoj (USAID BiH) i Antikorupcijske mreže organizacija civilnog društva u BiH – ACCOUNT.

Forumu su prisustvovali predstavnici Omladinske grupe ORC, predstavnici Ministarstva obrazovanja, odgojno-obrazovnih ustanova TK, akademske zajednice i medija.

Moderator Foruma i predstavnik Omladinskog Resursnog Centra bio je Emir Karamujić.



## Global youth service day



Na relaciji Stupari - Planinarski dom „Javorje“, 21. aprila 2018. godine, održana je akcija sakupljanja smeća i obilježavanja već postojećih planinarskih oznaka povodom Global Youth Service Day-a. Akcija sakupljanja smeća, obilježavanja oznaka i planinarenja je nastala po uzoru na modifikovanu verziju popularne aktivnosti - pod nazivom „plogging“, koja podrazumjeva trčanje i sakupljanje smeća.

Cilj projekta je čišćenje planinarske staze i podizanje svijesti o očuvanju okoliša, obilježavanja oznaka kako bi se povećala sigurnost planinara, kao i inovativnokombinovanje sportskih aktivnosti sa društveno korisnim radom. Projekat su realizovali YES Alumni BiH i Omladinska grupa ORC Tuzla. Predstavnik ORC Tuzla je bio Emir Karamujić.

## New age conflict transformation



Od 12. do 19. aprila u Vršcu je održan trening seminar za izgradnju kapaciteta mreže za konflikt transformaciju, u okviru projekta „New Age Conflict Transformation“.

Trening seminar je okupio predstavnike partnerskih organizacija u projektu iz: Bosne i Hercegovine, Srbije, Slovenije, Rumunije, Turske, Kosova i Makedonije, sa ciljem izgradnje kapaciteta mreže usmjerene na transformaciju konflikta u virtuelnom i stvarnom svijetu, koristeći inovativne pristupe i metode.

Učesnici seminara su također radili na vještinama komunikacija na društvenim mrežama i marketingu.

Projekat „New Age Conflict Transformation“ je sufinansiran od strane Erasmus+ programa Evropske Unije.

Organizator treninga je organizacija iz Srbije, Balkan Urban Movement.

Predstavnik ORC Tuzla bio je Emir Karamujić.



## REDOVNE AKTIVNOSTI ORC I HCA TUZLA

Tokom aprila radili smo na održavanju i razvoju komunikacija i koordinacije unutar Omladinske mreže Bosne i Hercegovine ([www.omladina-bih.net](http://www.omladina-bih.net)). U okviru toga smo svakodnevno na mejling listu mreže ([posta@omladina-bih.net](mailto:posta@omladina-bih.net)), ali i na druge adrese u Bosni i Hercegovini i regiji distribuirali informacije interesantne za mlade i omladinski aktivizam u BiH. Vršili smo korespondenciju sa organizacijama i pojedincima zainteresovanim za rad mreže, odgovarali na upite vezane za određene aktivnosti, edukacije i ostale informacije vezane za aktivizam mladih u BiH. Isto tako, naš projektni tim nastavio je sa apliciranjima za projekte.

## PLANOVI HCA/ORC-A ZA MAJ 2018.

### Press konferencija „Prihvatanje oštećenosti“

U sklopu projekta „Podijeljena prošlost – zajednička budućnost“, koji realizuje 19 organizacija iz država Zapadnog Balkana zajedno sa Turskom, u Bosni i Hercegovini se implementira Nacionalna kampanja „Prihvatanje oštećenosti“.

Kampanju, koja traje od februara, realizuje Omladinski resursni centar iz Tuzle i do sada smo organizovali trening za 20 mladih iz Tuzle, flash mob i sađenje vremenske kapsule, ali i okrugli sto u Sarajevu, praćen press konferencijom za medije.

Posljednja aktivnost kampanje je Press konferencija koja će se realizovati u Banja Luci 11.5.2018. godine sa početkom od 11h u Internacionalnom Press Centru u Hotelu Bosna.

Tokom press konferencije ćemo prezentovati rezultate naše kampanje, ali i upoznati javnost sa Kvalitativnim istraživanjem: Proces pomirenja na Zapadnom Balkanu i Turskoj.

### Građanska laboratorija za društvene inovacije Tuzla

U sklopu projekta „Podijeljena prošlost - zajednička budućnost“, koji realizuje 19 organizacija iz država Zapadnog Balkana zajedno sa Turskom, u Bosni i Hercegovini se implementiraju Građanske laboratorije za društvene inovacije.

Krajem mjeseca aprila realizovana je prva Građanska laboratorija u Vitezu, a 17. Maja tekuće godine planirana je druga, koja će se održati u Tuzli. Laboratorija će okupiti 50 učesnika iz različitih sfera interesovanja, koji će zajednički raditi na donošenju zaključaka i preporuka za dalje korake projekta „Podijeljena prošlost – Zajednička budućnost“.

Projekat realizuje Omladinski komunikativni centar Banja Luka, a podržan je od strane Evropske Unije

## AKTIVNOSTI ČLANICA OMLADINSKE MREŽE BiH

Institut za  
razvoj mladih KULT



Ul. 4. Viteške brigade  
34 – 36 BA, 71210 Ilidža,  
Sarajevo  
Tel: +387 33 778 778.  
Fax: +387 33 778 79  
E-mail: [kult@mladi.org](mailto:kult@mladi.org),  
web: [www.mladi.org](http://www.mladi.org)

### Kreativci iz Blažuja u službi invalidnih i bolesnih osoba

Institut za razvoj mladih KULT, u okviru realizacije Lokalnih građanskih inicijativa na području cijele Bosne i Hercegovine podržao je i aktivnosti Udruženja invalidnih i bolesnih osoba Blažuj.

Prostorije ovog udruženja smještene su u Blažuju, a utočište su i prostor radno-okupacione terapije za brojne sugrađane koji imaju neki oblik invaliditeta ili oboljenja, ali i za one kojima ovakva podrška znači ljepši život i kvalitetnije vrijeme. Uz podršku stručnog osoblja učestvuju u procesu izrade tapaciranog namještaja i dekorativnih predmeta i tako lakše prevazilaze svakodnevnicu.



Trenutno u ovim prostorijama u okviru lokalne građanske inicijative koju realizuje Udruženje, a finansijski podržava Institut, nastaju ukrasni jastuci, taburei i male stolice. Izrađuju ih članovi udruženja, a nakon što budu gotovi biće uručeni onima kojima su najpotrebniji.

Lokalna građanska inicijativa (LGI) jeste akcija, aktivnost građana/ki usmjerena na poboljšanje stanja u lokalnoj zajednici i društvu u kojem žive. U građanske aktivnosti mogu se uključiti građani/ke pojedinačno ili zajednički, a sve s ciljem ukazivanja na konkretne probleme i rješavanja problema u zajednici u kojoj žive.

## Mladi aktivisti iz deset zemalja grade bolje sutra za nove generacije

Institut za razvoj mladih KULT dio je inicijative „Aktivni mladi – korak ka zajedničkim promjenama“.

Ova inicijativa u narednom periodu okupit će iskusne omladinske radnike i aktiviste iz Bosne i Hercegovine, Srbije, Crne Gore, Slovačke, Makedonije, Hrvatske, Kosova\*, Albanije, Grčke i Češke, a sa ciljem aktivnijeg učešća mladih u javnom i političkom životu zajednice. Cilj je pokrenuti mlade u ovim zemljama i motivisati ih da budu aktivniji i daju više doprinosa promjenama koje su neophodne ovoj populaciji. Ako želimo stvarne promjene, moramo započeti sa promjenom svijesti kod mladih – polaznica je inicijative.



On-line aktivizam, ljudska i građanska prava, uvođenje obaveze izlaska na izbore samo su neke od tema kojima će se mladi aktivisti baviti tokom trajanja inicijative.

Mladi aktivisti pohađat će četverodnevni trening, biti dio lokalnih akcija, ali i kreirati niz preporuka kako do boljeg položaja mladih.

Prvi sastanak tima koji će voditi cijelu inicijativu održan je 13. aprila 2018. godine u Sarajevu, a javni poziv za odabir mladih aktivista koji će biti dio realizacije inicijative biće raspisan početkom maja.

Inicijativu realizuju Razvojni centar za mlade, Udruženje YouthWach iz Slovačke, Intermedia iz Srbije, COSMO iz Crne Gore i Institut za razvoj mladih KULT, a uz podršku Evropske omladinske fondacije Vijeća Evrope.





## OMLADINSKA ORGANIZACIJA "SVITAC"

Ul. Jusufa Čampare bb, 76100 Brčko Distrikt BiH  
Tel./Fax: +387 49 211 032  
E-mail: [svitac@gmail.net](mailto:svitac@gmail.net)  
Web: [www.svitac.org](http://www.svitac.org)  
FB: [www.facebook.com/omladinska.svitac](https://www.facebook.com/omladinska.svitac)

## Dnevne radionice

Omladinska organizacija Svitac je u aprilu nastavila sa svakodnevnim aktivnostima. Učesnici su podijeljeni u dvije grupe, uzrast 4-7 godina svakim danom od 11:00-13:00, a uzrast 8+ od 14:00-15:30 časova. Mlađi učesnici su pravili razne edukativne, proljetne, dekorativne i maštovite stvari uz pomoć lokalnih i međunarodnih volontera. Kreacije su ovaj mjesec rađene na razne teme, a neke od tih kreacija su: origami cvijetovi, pas i ždral, šumske i domaće životinje, te razlike među njima, lutke za ruke od papirnih vrećica za sendviče i ptice od geometrijskih oblika.



Ovaj mjesec su učesnici vježbali i pjesmu „Kiša pada, trava raste“. Materijal korišten na radionicama je karton u boji, kolaž papir, drvene i masne bojice, makaze, ljepilo, šljokice, drveni štapići, dekorativni i ukrasni papir, plastelin, vuna. Drugi dio radionice je namijenjen za relaksaciju, osvježanje, jogu, sportske i razne takmičarske igre. Cilj ovih aktivnosti kao i do sada je da djeca razviju maštu i da koristeći razne materijale izraze svoju kreativnost, te da razviju motoriku, osjećaj tolerancije i poštovanje prema drugima i usvoje lijepo ponašanje.

Učesnici druge radionice (14:00-15:30), za uzrast 8+, su vrijedno učestvovali u raznim aktivnostima.

Ponedjeljkom je kreativno izražavanje na kojima su učesnici pravili kreacije koristeći razne materijale. Neke od tih kreacija su: ukrasne kutije za nakit, te narukvice od vune i trakica. Utorkom su učesnici vježbali engleski jezik i svakodnevnu komunikaciju, te razne igre koje poboljšavaju učenje engleskog u grupi i timski rad. Ovaj mjesec su vježbali kako poslati osobu ili predmet negdje, koristeći pridjeve, te su radili sa fleš karticama na temu morske životinje. Srijedom su radili turski alfabet i osnove kako se predstaviti, četvrtkom sportske aktivnosti „Svitac adventure board game“ a petkom radionice njemačkog jezika. Cilj i ovih aktivnosti je da učesnici razviju maštu i da koristeći razne materijale izraze svoju kreativnost, razviju motoriku, osjećaj tolerancije, poštovanje prema drugima i usvoje lijepo ponašanje. Koordinator radionica u aprilu je bio Adin Midžić uz asistenciju lokalnih, Weltwaerts i ERASMUS+ međunarodnih volontera. Sve aktivnosti se održavaju u Omladinskom centru Brčko distrikta.

## „Pričajmo njemački“ – radionice komunikacije na njemačkom jeziku sa izvornim govornicima

Radionice njemačkog jezika se održavaju dva puta u sedmici u prostorijama Omladinskog centra Brčko distrikta. Radionice se održavaju u sledećim terminima: četvrtkom - za početnike A1 nivo (16:30-17:30), za A2 level (17:30-18:30), te za B1/B2 (18:30-19:30). Radionice komunikacije na njemačkom jeziku su namijenjene svima koji žele naučiti osnove gramatike i usavršiti već postojeće znanje i steći nova iskustva i poznanstva. A1 grupa je ovaj mjesec radila sate, fraze iz dnevne rutine i narudžbe u kafeu. A2

je radila kompleksnije fraze iz dnevne rutine, kako se predstaviti na razgovoru za posao i kako naručiti hranu u restoranu, dok je napredna grupa B2 obrađivala temu porodični odnosi i prednosti i mane plaćanja u gotovini, online ili karticom. Koordinator projekta su međunarodne volonterke iz Njemačke.

## RADIONICE GITARE

Učesnici ove radionice su nastavili uvježbavati etide F.Sora, M.Carcassija, Rolanda Dyensa, Thierry Tisseranda, F.Tarrege, nekolicinu novih pop pjesama po vlastitom izboru („Sweet dreams“ „Little Things „Fragile“), melodiju i harmoniju jazz standarda „Freddie Freeloader,, (Miles Davis) i improvizaciju na zadatu harmoniju.

## Radionice sambe

Grupa je nastavila raditi na kompoziciji radnog naslova „Perodactyl“. Sekciji je pridružena još jedna električna gitara, te su razrađena dva nova prelaza i uvod u novu kompoziciju u bržem tempu.

## WORLD LIFE EXPERIENCE

Omladinsku organizaciju Svitac je u periodu od 10. - 15. 04. posjetila je grupa učesnika projekta World Life Experience (<https://www.worldlifeexperience.com/>).



To je grupa od 11 mladih i entuzijastičnih ljudi iz svih dijelova svijeta, koji su izabrani da zajedno putuju svijetom i upoznaju se s kulturom i istorijom mjesta koja obilaze. Osim toga oni takođe provode određeno vrijeme volontirajući u lokalnoj zajednici u kojoj se trenutno nalaze. Ovaj put su u Brčkom podržali rad Omladinske organizacije Svitac, te su proveli šest dana sa zaposlenima i volonterima, pomažući im u pripremanju i realizaciji raznih multikulturnih i obrazovnih aktivnosti za djecu i mlade.

## Proljetni festival

Povodom Međunarodnog dana planete, Omladinska organizacija Svitac je, u suradnji sa Glossa-centrom za njemački jezik Brčko, 20.04. u Omladinskom centru organizovala Proljetni festival. Gosti su imali priliku da pogledaju zabavan program, kojeg su pripremili lokalni i međunarodni volonteri Omladinske organizacije Svitac i uposleni Glosse. Nakon programa, održane su dvije stanice za uzrast 7+, timske igre i kreativna radionica na kojima su učesnici imali priliku da se okušaju u pravljenju papirnih cvijetnih kreacija. Proljetni festival je završen osvježanjem i druženjem.



Za maj se planira nastavak svih redovnih radionica Omladinske organizacije Svitac.



## PRONI Centar za omladinski razvoj

Ul. Mehmedagića 24, 76100 Brčko distrikt BiH  
Tel./Fax: +387 49 217 695  
E-mail: pronibrcko@teol.net  
www.pronibrcko.ba

## Nasilje u porodici

Predstavnici PRONI Centra 10.04.2014. učestvovali su u radu Okruglog stola: "Nasilje u porodici", gdje su predstavili svoj rad i dostignuća u oblasti zaštite prava žena, djece i žrtava nasilja u porodici. Čestitamo udruženjima Gender Brčko i IPA Brčko na organizaciji ove aktivnosti.

## Osposobljavanje građana za učešće u donošenju javnih politika

PRONI Centar je 20.04.2018. učestvovao na OSCE Mission to Bosnia and Herzegovina projektu: "Osposobljavanje građana za učešće u donošenju javnih politika" koji ima za cilj jačanje kapaciteta ciljnih grupa građana u svrhu njihovog efikasnijeg uključivanja u proces donošenja javnih politika Brčko distrikta BiH.

Projekat se sastoji iz obuke koja sadrži tri modula i samog aktivnog učešća građana u procesu donošenja odluka.

## Razumijevanje krivičnih djela počinjenih iz mržnje i diskriminacija



Dana 27.04.2018. godine, bili smo prisutni na prvom modulu treninga kojeg organizuje OSCE, pod nazivom „Razumijevanje krivičnih djela počinjenih iz mržnje i diskriminacija“. Ovo je prvi modul od ukupno tri, koja će se održati u narednom periodu. Naš predstavnik bio je Harun Šabanović.

## Biciklistička trka Beograd – Banja Luka

Prva etapa 12. međunarodne biciklističke trke "Beograd - Banja Luka", završena je 28. aprila u Brčkom. Trku je podržao i PRONI Centar za omladinski razvoj i LVS Brčko & LVS Bijeljina, na način da smo obezbijedili 12 volontera/ki koji su bili raspoređeni duž etape i pružili podršku policiji u osiguranju trke. Trka je imala više od 200 takmičara/ki iz 32 drzave svijeta.

Veliko hvala svim volonterima/kama. @ Brck0



## TRENING NA TEMU ZAGOVARANJE

Dana 06.04.2018. proni Centar za omladinski razvoj za članove Vijeće mladih Federacije BiH, članove Omladinski savjet Republike Srpske i omladinske organizacije iz Brčko distrikta BiH održao je trening na temu: Zagovaranje.

## PRONI Centar u Sarajevu kao Contact Point BiH Erasmus+ YOUTH



PRONI Centar kao Contact Point BiH Erasmus+ YOUTH za BiH učestvovao je 23.04.2018. na sastanku, nakon potpisivanja Memoranduma o saradnji u oblasti mladih između Ministarstva civilnih poslova BiH i Ministarstva školstva, nauke, istraživanja i sporta republike Slovačke, sa direktorom odjela mladih Ivan Hromada.

Na sastanku je bio prisutan i Ambasador Slovačke u BiH Martin Kačo.

## PRONI na sastanku o usklađivanju propisa Brčko distrikta BiH s pravnom stečevinom

Komisija za evropske integracije Skupštine Brčko distrikta BiH uz podršku Kancelarije EUD/EUSR i Misije OSCE-a u BiH 19.04.2018. je organizovala prezentaciju o temi usklađivanja propisa Brčko distrikta BiH s pravnom stečevinom EU za članove Komisije za evropske integracije i Zakonodavne komisije Skupštine, Stručnu službu Skupštine Brčko distrikta BiH i predstavnike omladinskih organizacija u Brčko distriktu BiH. Predstavnik PRONI Centra je generalni menadžer organizacije, Jasmin Jašarević.

## Okrugli stol: “Jačanje kapaciteta OCD-a za socijalno okruženje”

PRONI Centar za omladinski razvoj je 10. aprila organizovao okrugli stol pod nazivom “Jačanje kapaciteta OCD-a za socijalno okruženje” gdje smo ugostili predstavnike Vijeće mladih Federacije BiH, Omladinski savjet Republike Srpske, Ministarstvo civilnih poslova BiH, Ministarstvo porodice, omladine i sporta RS, Ministarstvo kulture i sporta FBiH kao i predstavnici iz Odjeljenje za obrazovanje Brčko distrikta BiH i Pododjeljenje za podršku mjesnim zajednicama i NVO.

Na okruglom stolu razgovaralo se o iskustvima i postignućima organizovanja mladih u BiH kao i o unapređenju položaja mladih kroz jačanje kapaciteta vijeća mladih u BiH. Okrugli stol je podržan od strane CSO Partnership for Development Effectiveness.





## H.O. MUSLIMANSKO DOBROTVORNO DRUŠTVO – MERHAMET DOBOJ

Ul. Kralja Aleksandra 17, 74000 Dobož  
Tel./fax: +387 53 226 886  
E-mail: merhamet.doboj@cutuk.net  
FB: [www.facebook.com/Merhamet-Doboj](http://www.facebook.com/Merhamet-Doboj)

Osim stalnih aktivnosti koje podrazumijevaju: evidentiranje članarine, pomoći korisnicima "Merhameta" (štampanje molbi, žalbi, raznih dopisa, fotokopiranje), pružanje informacija, raspodjela humanitarne pomoći, izrada projekata i prisustvo seminarima, okruglim stolovima i drugim sesijama, u aprilu smo imali sljedeće aktivnosti:

**02.aprila** održan je Okrugli sto na temu "Unapređenje kvaliteta života starijih osoba", "Mreža za dostojanstveno starenje". Aktivisti Merhameta Dobož su prisustvovali ovoj veoma aktuelnoj temi i uzeli učešće u prijedlozima i idejama za ovu populaciju.



**14. aprila** djeca koja pohađaju vjeronauku u džamiji "Trnjak" su imala završni ispit, na čelu sa prof. Adilom ef. Rudanovićem. Djeca su stekla znanje arapskog jezika, a oni najmanji su nas oduševili. Učesnici su dobili prigodne poklone, kao i diplomu za osvojeno drugo mjesto za znanje iz Kur'ana, što im ovim putem čestitamo. Novčana nagrada Islamske zajednice, paketići Merhameta, i roditelja su obradovali djecu. Takođe čestitamo prof. Adilu ef. Rudanoviću na uloženom trudu.



**14.aprila** aktivisti Merhameta su vršili raspodjelu humanitarne pomoći, koje je, nažalost, sve manje. Lavovski se borimo da obezbijedimo minimum humanitarne pomoći, što je naravno veoma teško jer sve je manje donatora. Ovom podjelom obuhvaćeno je oko 300 porodica.

**16.aprila** održan je sastanak Lokalne akcione grupe po projektu Svjetske banke "Spriječavanje faktora zdravstvenih rizika u BiH" (grant TF0A4795), i ugovora Ministarstva zdravlja i socijalne zaštite RS. Sa JZU "Institut za javno zdravstvo RS". Gradonačelnik Doboja je formirao Lokalnu akcionu grupu grada Doboja, u koju je izabrana i predsjednica Merhameta, Avdić Faketa, koja će svojim učešćem doprinijeti radu "LAG-a"



**18 i 19. Aprila** Avdić Faketa, aktivistkinja Međureligijskog vijeća u BiH, prisustvovala je seminaru u Banja Luci na temu: "Kako uspješno komunicirati". Seminar je bio veoma interesantan i poučan, naročito komunikacija sa medijima. Učesnici seminara bili su iz: Banja Luke, Doboja, Bihaća i Livna. Seminar se održavao u Jevrejskom kulturnom centru, gdje je prijem bio veoma impresivan. Četiri konfesije: katolici, pravoslavci, muslimani i jevreji su prisustvovala Jevrejskoj molitvi, što je bilo veoma interesantno, jer smo obogatili naše znanje i proširili vidike.

**21.aprila** održan je "Sajam nacionalnih manjina" u sali Skupštine, gdje su prisustvovali i aktivisti Merhameta Dobj. Na sajmu su učestvovala i Kulturno umjetnička društva, Mažoretkinje Dobj , "Ples" Gračanica , KUD Prnjavor i druga Kulturno-umjetnička društva



**25.aprila** je u Banja Luci održan sastanak Regionalnog Merhameta, na kome su sumirane dosadašnje aktivnosti, i takođe informacije povodom predstojećeg Ramazana.



## INFORMACIJE / DONATORI / POZIVI

### Anketa: Mladi protiv nasilnog ekstremizma



U sklopu projekta “Mladi protiv nasilnog ekstremizma” jedan od prvih koraka jeste istraživanje kojim želimo saznati zašto se mladi iz Bosne i Hercegovine odlučuju na pridruživanje ekstremističkim i radikalnim pokretima. U posljednjih nekoliko godina je vidljiv trend pridruživanja mladih iz Bosne i Hercegovine ekstremističkim i radikalnim grupama. Kroz ovo istraživanje želimo da saznamo stavove i mišljenja mladih osoba na ovu temu.

Ovom prilikom Vas pozivamo da uzmete aktivno učešće u prvim koracima projekta koji za cilj ima borbu mladih iz Bosne i Hercegovine protiv nasilnog ekstremizma. Vaše stavove, saznanja i mišljenja o ovoj izuzetno bitnoj temi za nas mlade u Bosni i Hercegovini možete iznijeti klikom na:

[UPITNIK: MLADI PROTIV NASILNOG EKSTREMIZMA](#)

“Mladi protiv nasilnog ekstremizma” je partnerski projekat PRONI Centra za omladinski razvoj, Omladinskog resursnog centra Tuzla i organizacije PAX iz Holandije. Projekat je podržan od Holandske ambasade i MATRA projekta.

Unaprijed Vam se zahvaljujemo na interesu za doprinos boljem i sigurnijem društvu za mlade u Bosni i Hercegovini!

### Fondacija tuzlanske zajednice / Omladinska banka – Poziv za omladinske organizacije i neformalne grupe mladih

**OMLADINSKA BANKA** jeste program podrške idejama i inicijativama mladih koji na poseban način uključuje mlade u život zajednice, te ih motiviše na učešće u pozitivnim promjenama unutar iste.

Mlad si i član si omladinske organizacije ili neformalne grupe mladih iz Srebrenika, Kalesije, Živinica, Lukavca ili Tuzle. Imaš ideju kojom želiš doprinjeti unaprijeđenju kvaliteta života mladih sa područja tvoje zajednice. Omladinska banka Fondacije tuzlanske zajednice nudi ti podršku kako bi svoju ideju sproveo/la u djelo.

#### CILJEVI

Osnaživanje kapaciteta mladih u svim sferama njihovog djelovanja

Osnaživanje mladih na samostalno donošenje odluka i djelovanje u lokalnoj zajednici

Osnažiti omladinski sektor kroz jačanje programskih i organizacionih kapaciteta omladinskih organizacija.

#### PODRUČJE DJELOVANJA

Program Omladinske banke Fondacija tuzlanske zajednice sprovodi na području općina **Kalesija, Lukavac, Srebrenik, Živinice**, i na području **Grada Tuzla**.

#### KO MOŽE APLICIRATI?

Mladi od 15-30 godina

## Neformalne grupe mladih sa područja gore navedenih općina (imaju prednost)

Registrovana udruženja mladih sa područja gore navedenih općina

### ŠTA PODRŽAVAMO?

Inovativne projekte iz različitih područja društvenog života koji odgovaraju na potrebe lokalne zajednice i kojim se direktno utiču na poboljšanje položaja mladih.

Projekti promovišu građanski aktivizam i volonterizam i zasnovani su na volonterskom angažmanu aplikantat.

Projekti su usmjereni na konkretno rješavanje određenog problema ili zadovoljene određene potrebe u zajednici .

Podržavamo isključivo kratkoročne projekte koji traju **do 6 mjeseci**.

Donacije se izdaju u vrijednosti **do 800 KM**.

### ROK ZA PRIJAVU

Poziv za prijem aplikacija u I aplikacionom krugu otvoren je **do 27. maja 2018. godine**.

### KAKO APLICIRATI?

**Aplicirati možete isključivo putem platforme za online apliciranje koja se nalazi na web stranici Fondacije tuzlanske zajednice.** Prilikom apliciranja možete se koristiti ranijom projektnom aplikacionom formom kao urnekom, ali i uputama za popunjavanje online aplikacije.

Nakon što online aplikacija bude prihvaćena aplikant će dobiti potvrdu o prijemu na mail u vidu word dokumenta ispunjene aplikacije, te ste dužni u roku od 7 dana dostaviti tu aplikaciju potpisanu i ovjerenu u dva štampana primjerka na adresu Fondacije: Pozorišna 13, 75000-Tuzla (lično ili poštom).

Ukoliko vam je potrebna podrška pri ispunjavanju online aplikacije možete se obratiti direktno u kancelariju Fondacije tuzlanske zajednice, na broj telefona 035 362-830/831 ili u putem mail.a:

Za Lukavac na [obl@fondacijatz.org](mailto:obl@fondacijatz.org)

Za Kalesiju na [obk@fondacijatz.org](mailto:obk@fondacijatz.org)

Za Srebrenik na [obs@fondacijatz.org](mailto:obs@fondacijatz.org)

Za Živinice na [obz@fondacijatz.org](mailto:obz@fondacijatz.org)

Za Tuzlu na [obt@fondacijatz.org](mailto:obt@fondacijatz.org)

**OBAVEZNO** pročitajte detaljnije informacije, upute za popunjavanje online aplikacije i kriterije.

## Grantovi Vlade Japana

Vlada Japana je prvi put 1989. godine pokrenula program pomoći pod nazivom "Grass Roots Projects (GAGP)", temeljni projekti, kao dodatak Generalnom programu pomoći vlade Japana. Od 1996 godine preko 180 projekta u ukupnom iznosu od cca. 10 miliona EUR / 19 miliona KM je implementirano u Bosni i Hercegovini u okviru GAGP programa.

Iako obje sheme imaju za cilj pružanje pomoći zemljama u razvoju u namjeri da im pomogne da zadovolje osnovne ljudske potrebe i riješe socijalno-ekonomske izazove, GAGP je fokusiran na podršku lokalnim zajednicama, odnosno direktno stanovništvu.

U okviru GAGP grantovi se dodjeljuju javnim institucijama (općinama i općinskim javnim poduzećima), osnovnim školama, domovima zdravlja ili organizacijama civilnog društva koje sprovode relativno male projekte.

### Prioriteti

Unutar programa GAGP Japan podržava širok spektar projekata koji se baziraju na osnovne ljudske potrebe, kao i koji se baziraju na sigurnost. U Bosni i Hercegovini većina projekata koji se implementiraju unutar GAGP spada u sljedeće kategorije:

– Pomoć aktivnostima za deminiranje

- Javno zdravstvo
- Obrazovanje
- Socijalna zaštita
- Ruralni razvoj

### **Aplikanti**

Prihvatljivi aplikanti su: javne institucije (općine i općinska javna poduzeća), osnovne škole, domovi zdravlja i lokalne i međunarodne organizacije civilnog društva

Neprihvatljivi aplikanti su: fizička lica, organizacije centralne vlasti (prihvatljivi samo u izuzetnim slučajevima) obdaništa, istraživački instituti, institucije višeg obrazovanja, bolnice, političke organizacije, vjerske ustanove.

### **Grant**

GAGP finansira izgradnju i/ili nabavku opreme i/ili materijala. Svi predloženi materijali, oprema i usluge, treba da budu nabavljeni od domaćih dobavljača.

Grantovi isključivo pokrivaju troškove nabavke robe/usluga bez PDV-a.

### **Administrativni i operativni troškovi nisu prihvatljivi.**

Maksimalan iznos raspoloživih sredstava po projektu je 10 miliona JPY (približno 80,000.00 EUR-a ili 156,000.00 KM), osim za projekte pomoći aktivnostima za deminiranje gdje maksimalan iznos granta može biti veći od 10 miliona JPY.

GAGP neće pružiti finansijsku potporu za projekte kao što su kulturno sportski događaji, aktivnosti vezane za biznis, niti za aktivnosti koje se odnose na religiju.

### **Podnošenje aplikacije i procedure koje treba da se slijede**

#### **1. Dostava aplikacije**

Aplikacija se ispunjava na lokalnom ili engleskom jeziku, te dostavlja putem pošte na adresu ambasade: Bistrik 9, 71 0000 Sarajevo. Aplikacija se može dostaviti tokom cijele godine.

#### **2. Provjera i odobravanje**

Po primitku aplikacije, Ambasada Japana provjerava cilj, troškove i očekivani socijalno-ekonomski pozitivni uticaj projekta. Za sve projekte koji su uzeti u razmatranje Ambasada će napraviti pred-selekciju onih projekata koji odgovaraju ciljevima GAGP i osoblje Ambasade će upriličiti posjetu potencijalnom projektu području. Ambasada će ih predložiti Ministarstvu inostranih poslova Japana koje je krajnja institucija koja odobrava projekte.

#### **3. Grant Contract (G/C) – Grant ugovor**

Po konačnom odobrenju, ambasada Japana i organizacija koja prima pomoć će zaključiti ugovor (G/C) koji uključuje naziv, cilj i sadržaj projekta, naziv organizacije primaoca pomoći, visinu iznosa koji će biti obezbjeđen putem GAGP i stavke o ispravnom utrošku sredstava.

#### **4. Trošenje sredstava**

Nakon toga, korisnik granta će zaključiti ugovor o nabavci (P/C) za robu i/ili usluge sa dobavljačem. Ambasada će pregledati P/C (ili dokaz/predračun) da bi ustanovila da li je ista odgovarajuća. U načelu trajanje projekta (vrijeme neophodno za nabavku robe i /ili usluga) bi trebalo biti do jedne godine dana.

#### **5. Izvještavanje**

Ambasada će tražiti od primaoca GAGP granta da pripremi i dostavi izvještaj o stanju projekta i to dva puta ukoliko se radi o standardnom projektu, a ukoliko je obim projekta veći broj traženih izvještaja će biti veći. Osoblje Ambasade može posjetiti mjesto projekta da bi se uvjerilo da se sredstva koriste za namjenu za koju su odobrena.

Više informacija: <http://www.bosnia.emb-japan.go.jp/BHS/EconomicGAGP.html>

## IMEP: Javni poziv za dodjelu ad hoc grantova

### Projektom je planirana dodjela 4 vrste grantova:

1. New voices
2. Media mixer
3. Media production
4. Ad hoc

### Glavni ciljevi dodjele grantova u IMEP programu su:

- 1) Podržati produkciju visokokvalitetnog sadržaja, ojačati nezavisnost medija
- 2) Poboljšati doseg medija do korisnika i komunikaciju sa njima
- 3) Promovirati inovativni pristup i kritičko razmišljanje
- 4) Doprinijeti boljem okruženju za rad medijskih kuća i novinara
- 5) Ojačati kapacitete novinara i medija i primjenu profesionalnih standarda
- 6) Promovirati ravnopravnost spolova, EU integracije BiH, jednaka prava za sve i druga pitanja od interesa za demokratizaciju bh. društva

Ad hoc grantovi se dodjeljuju za nepredviđene situacije, za događaje koji se mogu dogoditi, ali ne moraju nužno spadati pod neki od navedenih tipova dodjele grantova i koji zahtijevaju hitan odgovor/reakciju. Iznosi koji će se dodjeljivati u okviru Ad hoc grantova iznositi će do 5,000.00 USD.

### Prihvatljivi troškovi unutar ovog Poziva su:

- Prevoz;
- Sigurnost;
- Produkcijски tim;
- Drugi opravdani troškovi koji se direktno odnose na implementaciju aktivnosti.

Predloženi projekat unutar ovog Javnog poziva ne može trajati duže od 6 mjeseci.

Podnosioci prijave za ovaj Javni poziv mogu biti novinari, grupe novinara, OCD, privatni mediji (TV, radio, štampa, web portali), novinari-građani ili kombinacija prethodno navedenih kategorija.

Aplikanti mogu dobiti najviše dva granta unutar ovog Javnog poziva. Mediji se također mogu prijaviti i za Media mixer i Media Production grantove u okviru medijske šeme raspodjele grantova, a građani-novinari se mogu prijaviti za New Vocies grantove.

Ovaj Poziv je otvoren za sve potencijalne aplikante koji su rezidenti (fizičke osobe) ili su registrovani (pravna lica) na području Bosne i Hercegovine.

Kompletan poziv: [Javni poziv za dodjelu Ad Hoc grantova](#)

Više informacija: <http://objavi.ba/aktivni-grantoviaktivni-grantoviaktivni-grantovi/aktivni-grantovi/>

## Otvoren konkurs za dodjelu sredstava za podizanje kvalitete turističke ponude TK

Turistička zajednica Tuzlanskog kantona jučer je **raspisala treći Javni poziv za dodjelu bespovratnih sredstava** za projekte podizanja kvaliteta turističke ponude Kantona za 2018.godinu. Za ove namjene osigurano je 70.000 konvertibilnih maraka.

Javni poziv predviđa tri programa. Prvi se odnosi na projekte razvoja i uvođenja turističkih proizvoda. Drugi, između ostalog, predviđa organizovanje javnih sadržaja, te podršku ekološkim projektima, a treći organizaciju značajnih turističkih i kulturno-sportskih manifestacija.

**“Radi se o 70.000 konvertibilnih maraka i ovo nam je treći poziv u mom mandatu.Sva ta sredstva vraćamo za razvoj turizma u TK. Pozitivna priča o turizmu se realizira i svi koji su bili neodlučni čime da**

se bave sada se opredjeljuju za turizam u TK”, kazao je predsjednik Turističkog vijeća TZ TK Mirsad Gluhić.

Prema kriterijima, aplicirati mogu pravna i fizička lica registrovana za turističku i ugostiteljsku djelatnost, udruženja i nevladine organizacije s područja Tuzlanskog kantona.

**“Mogu se prijaviti svi oni koji rade i djeluju, i registrovani su na području TK”,** istakao je voditelj Turističke zajednice TK Miralem Mešković.

Javni poziv je otvoren u narednih 15 dana.

Izvor: <https://www.akta.ba>



## Dragi prijatelji,

*Ukoliko ste zainteresovani da se u mjesečnom informativnom biltenu Omladinskog resursnog centra (ORC) Tuzla i Omladinske mreže Bosne i Hercegovine objave: vaši pozivi za zajedničke aktivnosti i saradnju, informacije o aktivnosti, konkursi za radna mjesta, apeli za pomoć ili podršku, saopštenja za javnost i svi drugi nekomercijalni oglasi, možete se javiti na jednu od dole navedenih adresa.*

*Rok za dostavljanje informacija za svako naredno izdanje je 30-ti u mjesecu.*

*Adrese za slanje vaših informacija za mjesečni bilten:*

**Omladinski resursni centar  
Tuzla**

**Hadži Bakirbega Tuzlića 1  
75000 Tuzla**

**tel/fax: 035 258 077**

**e-mail: [orctuzla@bih.net.ba](mailto:orctuzla@bih.net.ba)  
[hcatuzla@bih.net.ba](mailto:hcatuzla@bih.net.ba)**

*Mjesečni bilten uređuje  
Omladinski resursni centar -  
ORC Tuzla*

*Bilten uređuje: **Amila Selimbašić**  
Prevod Biltena na engleski: **Emir Karamujić***

*WEB stranica Mreže:  
**[www.omladina-bih.net](http://www.omladina-bih.net)***

*Mejling lista Mreže:  
**[posta@omladina-bih.net](mailto:posta@omladina-bih.net)***

*Webmaster:  
**[emir.delalic@gmail.com](mailto:emir.delalic@gmail.com)***